

## Naqqiut

Akissut 10. Oktober 2022-meersoq taarserpaa

(Allannguutitut siunnersuut nutaaq)

**Angerlarsimaffinni varmepumpenik aammalu solcellinik pilersitsinissamut pitsaaqutit aammalu ajoqutit misissornissaanut Naalakkersuisut nassuiaammik suliaqarnissaat pillugu Inatsisartut aalajangiiffigisassaattut siunnersuut. Nassuiaat taakkuninnga ikkussisoqartillugu Namminersorlutik Oqartussat tapiissuteqarsinnaanissaannut aaqqiissummik eqqarsaatersuutinik imaqassaaq. Nassuiaat kingusinnerpaamik UKA 2023 Inatsisartunut tunniunneqassaaq.**

(Inatsisartunut ilaasortaq Nivi Olsen, Demokraatit)

### Akissuteqaat

(Nunalerinermut, Imminut Pilersornermut, Nukissiutinut Avatangiisinullu Naalakkersuisoq)

### Siullermeerneqarnera

Naalakkersuisuniit Inatsisartunut ilaasortaq Nivi Olsen, Demokraatit, aalajangiiffigisassatut siunnersuummik soqutiginaatilimmik matuminnga saqqummiussineranut qutsavigaarput.

Naalakkersuisuniit silap pissusia pillugu ajornartoortoqarnera ilisimavarput iliuuseqarlutalu. Silap pissusiata allannguutaat inunnit pilersinneqartut ullutsinni ulorianartorsiorfiusut annersaasa ilagaat. Kalaallit Nunaanni avannaani Siorapalummiit kujataani Narsarmijinut silap pissusiata allannguutaasa kingunerinut isiginnittuuvugut. Naalakkersuisuniit sermersuup aakkiartorneranut nunarsuullu allanngoriartorneranut iliuuseqarata isiginnittuuginnarnissarput kissaatiginnilarput, iliuuseqarnissaq kissaatigaarput.

Tamanna pissutigalugu 2030-mi nunatsinni pisortat innaallagissamik pilersuiffigisaani pilersitsiffiisunnaasuni tamani nukissiuutinik piujuartitsisumik atuilernissaq Naalakkersuisut anguniagaraat. Siullertut pingaarnertullu tamanna erngup nukinga atorlugu anguneqassaaq, kisiannili aamma periarfissanik allanik misissuissaagut.

Pisortat innaallagissiamik pilersuinerisa annersaannut nukissiuutit ataavartut tunngavigineqarput. Kisiannili inuiaqatigiinni nukissiamik atuneq tamarmiisoq isigigutsigu 18 procentiinnaat nukissiuutit ataavartuninngaanneersuullutik. Utoqqarmiut Kangerluarsunnguanni erngup nukinganik innaallagissiorfiup allineqarnissaanut aamma erngup nukinganik innaallagissiorfimmik, Qasigiannuanik Aasiannillu pilersuisussamik sananissamut aalajangernerit nukissiuutinik ataavartunik atuinerulernissamut aqqutissaapput pingaarutillit. Erngup nukinganik innaallagissiorfiit sarfamut piujuartitsiffiusumut attaviliisinnanermut qulakkeeriffiuginnassanngillat, aammali kiassaait uuliamik ikummatillit namminerisamik pigisat amerlasuut pisortat nukissiuutinik ataavartunik pilersuinerannut nuutsinnissaannut periarfissiisapput.

Nukissiorfiit ullumikkut illoqarfinni erngup nukinganik innaallagissiorfeqanngitsuni ataavartumik nukissiuutini namminerisamik pigisani nukissiamik sinneruttumik pisisarput. Aamma Nukissiorfiit illoqarfinni nunaqarfinnilu 13-ini seqernup qinngornerinik innaallagissiuutinik, najukkani dieseli atorlugu nukissiamik pilersuiffinnut pioreersunut tapertatut atorneqartunik ikkussuisimapput. Kisiannili najukkani

seqernup qinngornerinik innaallagissiaq piujuartitsiffiusoq suli nukissiamik pilersuinermi annikitsuinnarmik atorneqarpoq. Ima annikitsigaaq, suli nukissiornermut naatsorsuutini takuneqarsinnaani.

Ataavartumik nukissiuutit namminerisamik pigisat iluaqutissartaat ajoqutissartaallu pillugit annertunerusumik ilisimasaqalertariaqarnitsinnut Naalakkersuisut isumaqataapput. Avatangiisit mianeralugit innaallagissamut atuisut, pingaartumik innaallagissamik kiassarneq qaminneqarsinnaasumik kissamut pumpinik aamma seqernup qinngornerinik innaallagissiuutinik atuineq sanilliunneqartariaqarpoq.

Aamma kissamut pumpit pisortat innaallagissamik pilersuinerannut ilaatinneqalersinnaanersut Naalakkersuisuniit misissorneqarusuppoq. Ataatsimut isigalugu kissamut pumpit sunniisinnaaneri silaannatsinni nillertumi annikitsuinnaavoq, kisiannili aamma pissutsit allat sunniisinnaanermut sunniuteqartarput. Taakku ilisimasaqarfiginerulertariaqarpagut.

Illoqarfinni nunaqarfinnilu dieseli atorlugu pilersorneqartuni seqernup qinngornerinik innaallagissiuutinik ikkussuisoqarpat, tamanna ikummatissamik nunap iluaneersunik atuinermik annikillititseqataassaaq. Seqernup qinngornerinik innaallagissiuutit nammineerluni pigisat qanoq ilinerani silap pissusianut sunniutinik annikillititseqataasinnaanersut, aammalu inuiaqatigiit aningaasaqarnerannut iluaqutaasinnaanersut Naalakkersuisut misissuiffigerusuppaat.

Misissueqqissaarnissamut paasissutissat annertunerusumik suliarineqartariaqarput, taamaattumillu tamanna pillugu nassuiaasiornissamut piffissangaatsiamik atuinissamut immikkoortitsisoqartariaqarpoq.

Naalakkersuisut matuma siuliani oqaatigineqartut tunngavigalugit, matumuuna allannguutissatut siunnersuummik imaattumik saqqummiussipput:

***Kissamik pumpinik, seqernup qinngorneri innaallagissiuutinik nukissiuutinillu allanik ataavartunik angerlarsimaffinni atuilernissamut Naalakkersuisut pilersaarummik suliaqarnissaat pillugu Inatsisartut aalajangüffigisassaattut siunnersuut. Pilersaarut taakkuninnga ikkussisoqartillugu Namminersorlutik Oqartussat namminerisamik pigisanut tapiissuteqarsinnaanissaannut aaqqiissummik eqqarsaatersuutinik imaqassaaq. Pilersaarut kingusinnerpaamik UPA 2024-mi Inatsisartunut tunniunneqassaaq.***